

# Država oštećena za najmanje 11 miliona maraka

U budžet Bosne i Hercegovine (BiH) nije uplaćeno najmanje 11 miliona maraka za porez na trgovinu mesom i mesnim prerađevinama preko firme „Lijanović“ d.o.o Široki Brijeg i drugih firmi.

Ovo su podaci Uprave za indirektno oporezivanje BiH (BiH), čiji su djelatnici nekoliko godina pratili firmu „Lijanović“ i druge s njima povezane. O tome su izvještavali Tužilaštvo BiH, koje je pokrenulo akciju u kojoj su danas uhapšena četvorica braće: Jerko, Mladen, Slavo i Jozo Ivanković-Lijanović, njihov otac Stipo-Lijan Ivanković te još devet osoba među kojima je i ministar trgovine FBiH Milorad Bahilj.

U priopćenju iz UIO navodi sa da je u njihovim izvještajima, koje su zadnje četiri godine slali Tužilaštvu BiH, obuhvaćeno 14 fizičkih i šest pravnih osoba, koji se sumnjiče da su počinili veći broj krivičnih djela iz oblasti indirektnih poreza.

Inspektori su firmu „Lijanović“ d.o.o. povezali sa sljedećim firmama iz Širokog Brijega: „Farmer mesna industrija“ d.o.o., „Farmko“ d.o.o., „ZD.I. Produkt“, te „Laktat“ d.o.o. Posušje i „Mi-Mo“ d.o.o. Mostar. Povezanost svih privrednih subjekata pokazuje se kroz zaključivanje ugovora o iznajmljivanju objekata klaonice sa opremom za proizvodnju, pogona za preradu mesa i mesnih prerađevina sa kompletnom opremom i ugovora o licenci, koji preduzeće „Lijanovići“ zaključuje sa spomenutim preduzećima.

U izvještaju iz 2011. godine, [koji je u posjedu Centra za istraživačko novinarstvo \(CIN\)](#), navodi se da su Milorad Bahilj, aktualni ministar trgovine FBiH kao direktor u firmi „Mi-Mo“, Venka Ivanković, kao odgovorno lice u „Farmer mesna

industrija “ i Jozo Slišković, odgovorno lice u Farmko, počinili krivično djelo neplaćanja poreza u iznosu 2,7 miliona maraka. Svo troje su danas uhapšeni.

Inspektori UIO su Bahilja i Ivanković sumnjičili i za krivotvorenje ili uništavanje poslovnih ili trgovačkih knjiga ili isprava. Inspektori su pokušali izvršiti kontrolu u preduzećima “Mi-Mo” i “Farmer mesna idnustrija”, ali na prijavljenim adresama nisu pronašli nikakvu firmu kao ni natpise koji bi upućivali da su tu firme bile.

Bahilj je inspektorima rekao da je on od marta 2011. rješenjem Općinskog suda u Mostar razriješen dužnosti direktora i da ne zna gdje se nalazi dokumentacija preduzeća. Dokumentacija je navodno prebačena u preduzeće “Lijanovići”, ali je inspektori nikada nisu pronašli. Ni dokumentacija iz firme “Farmer mesna industrija”, koju je vodila Venka Ivanković, inspektorima nije bila dostupna.

Prema navodima iz institucija koje su uključene u ovu akciju, pripadnici grupe koja je danas uhapšena osnivali su više fiktivnih preduzeća na koje su u cijelosti prenosili svoju proizvodnju, koja su zatim nastavljala u kontinuitetu obavljati proizvodnju sa istim zaposlenim, u istim prostorijama, istim pogonima i po istoj licenci.

Prema nalazima inspektora, firma “Lijanović” je osnivala firme koje su se formalno vodile kao vlasnici ili korisnici određene pokretne i nepokretne imovine. Te firme su poslije podnosile zahtjev za povrat poreza na dodanu vrijednost ili su se formalno gasile, a da nisu platile porez. S obzirom da nisu raspolagale svojom pokretnom imovinom, jer je ta imovina bila iznajmljena, inspektori nisu mogli vršiti prinudnu naplatu duga. Prema informacijama UIO, takvi poslovni traju od 2009. godine.

Prema navodima iz Državne agencije za istragu i zaštitu (SIPA), koja je sudjelovala u akciji, danas je urađen pretres

objekata na 17 lokacija na području Širokog Brijega, Gruda i Mostara s ciljem pronalaska i privremenog oduzimanja predmeta koji mogu poslužiti kao dokaz u daljem postupku.

Uhapšeni su sumnjiče za sticanje protupravne imovinske koristi veće od 11,6 miliona KM. Protivpravnu imovinsku korist stekli su neplaćanjem i utajom PDV-a, od nenamjenski iskorištenih podsticaja za razvoj poljoprivrede, otuđenih zaliha robe Federalne direkcije za robne rezerve i neprikazane realizacije naplaćene u gotovini za prodatu robu na crnom tržištu. U priopćenju iz SIPA-e se navodi da su uhapšene osobe u namjeri da prikriju porijeklo nezakonito stečene imovinske koristi, navedeni novčani iznos vraćali u legalne finansijske tokove davanjem pozajmica i otkupom udjela od određenih pravnih osoba, te uplatom gotovine na račune.

Najmanje troje uhapšenih su predstavnici zakonodavne ili izvršne vlasti u institucijama FBIH i BIH. Jerko Ivanković-Lijanović je federalni ministar poljoprivrede, vodoprivrede i šumarstva te dopremijer ovog entiteta, njegov brat Mladen Ivanković-Lijanović je poslanik Predstavničkog doma državnog Parlamenta a Milorad Bahilj je federalni ministar trgovine.